

Date – 13/07/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
AKASHVANI AIZAWL

1. Chief Minister Pu Lalduhoma'n Mizo kutthemthiamte kutchhuak chuan state chhung mai ni lo ram pum huapin ngaihhlut a hlawh chho a ti.
2. Khawzawla nihawi tel her chhuah litre 2,000 chu vawiin khan Bawrhsap Pu K. Vanlalthiana'n khaw hrang hranga thawn chhuah turin a vai liam.
3. Supreme Court chuan khua leh tui nihna leh ramdangmi nihna tihchian dan chu dan dik tak hnuaiah leh thlei bik awm lova fim taka kalpui tur anih thu a sawi
4. Vietnam-a lawng chesuala thi India mi 15 te ruang chu vawiin khan phurh haw a ni

<><><>

CM

Chief Minister Pu Lalduhoma'n Mizo kutthemthiamte kutchhuak chu state chhung mai ni lo ram pum huapa ngaihhlut a hlawh chhoh zel thu a sawi.

Vawiina Tribal Cooperative Marketing Development Federation of India (TRIFED) leh Cooperation department tangkawp buatsaih Zo Fair (Adi Bazaar) hawanna inkhawm a telpuinaah he thu hi Chief Minister chuan a sawi a. Chief Minister chuan Mizo kutthemthiamte kutchhuak hrang hrangte chu state pawn market lama a thang hle tih sawiin kutthemthiamte thiamna chuan ram mipuite hriat a hlawh chho zel tih a sawi a. Mahni hman atan leh mahni inchhunga hman atana siam mai thin Mizo kutthemthiamte tan Huang Zauhna tur hun tha a rawn inher chho zel tih a sawi a ni.

Chief Minister chuan Tribal Cooperative Marketing Development Federation of India (TRIFED) leh Ministry of Tribal Affairs te hnathawh ropui a tih thu sawiin an hmalakna azarah tribal mipuite thleng phak anmahni dawmkanna tur sum tam tak pekchhuah a nih thin thu a sawi a. Kutthemthiamte tana hmasawna ruhrel dinna tur cheng vbc 6 chuang an tihchhuah thu a sawi.

Chief Minister chuan vawiina hmarchhak state hrang hrang atanga he Zo Fair-a dawr rawn hawng te chu mikhual an nih loh thu leh unaute an nih thu a sawi a. Ngaihngam taka mahni ina cheng anga Fair hman chhunga hun hmang thin turin a chah bawk a ni.

Zo Fair-ah hian dawr hrang hrang 25 hawn niin heng zingah eitur zawrhna dawr 2 a awm a. Mizoram pawn atangin dawr 15 an rawn hawng ve bawk a ni.

<><><>

NGAIZEL

Aizawl Ngaizela lungtlak mekna chu a chhak lung tlak hlauhawm la awmte scaling hmanga thenfai a, a theih ang a tuam lailawk tura rel a ni.
Kan corr report lo ngaithla ang.

Aizawl-a lungtla avanga harsatna thlen thin tu Ngaizel kawngchhak ko lung tla thin chungchang chu vawiin khan Aizawl Bawrhsap Pu Lalhriatpuia, Aizawl District Disaster Management Authority (ADDMA) Chairman hoa thutkhawm chuan an ngaihtuah a, thutkhawmah hian Aizawl khawpui huam chhunga lung tlak avanga thihna leh harsaatna hrang hranga thleng thei laka mipui te an him theih dan tur sawiho a ni a. Aizawl khawpui huam chhunga lung tlak hlauhawmna hmun: Ngaizel phei, Bawngkawn-Durtlang Road, Chanmari – Chaltlang Road, Chanmari-Ramhlun road a hmalak dan tur te ruahmanna siam a ni.

Thutkhawmah hian CEO, ADDMA bakah sawrkar department pawimawh hrang hrang – DM&R, PWD, Geology & Mining Department, Traffic, BRTF, Zonal Officer te leh Local Council aiawhte bakah State Technical Assessment Team for National Landslide Risk mitigation Program (NLRMP) aiawhte an tel a ni.

<><><>

SPECIAL INTENSIVE REVISION TRAINING

Mizoram puma Electoral Registration Officer (ERO) leh Assistant Electoral Registration Officer (AERO) te pualin Special Intensive Revision (SIR) 2026-a hming paih, inthunthar leh siamthat hun chungchang zirho vawiin khan Mizoram CEO Office buatsaihin Aizawlah neih a ni.

Joint CEO Pi Ethel Rothangpuui chuan Special Intensive Revision pawimawhzia sawiin ram leh hnam khawih thil a nih thu leh theihtawp chhuah a ngaih thu a sawi a. Enumeration phase a zo a. Tunah chuan claims and objection period ah an awm mek thu leh he hunah hian ERO leh AERO te tihtur chu a pawimawh thu a sawi a ni.

SIR 2026 Final Electoral Roll tarchhuah a nih hunah vote nei thei zawng zawng Electoral Roll-a an chuan theihna tur leh, vote nei thei lo te he Roll-ah hian an hming a lan ve lohna tura theihtawp chhuah a tul tih Joint CEO chuan a sawi a. Final Electoral Roll-ah hian hming lang lo tur an lo lang a nih chuan, anmahni mai bakah an tuchhuante thlengin India khua leh tui, vote nei thei nihna an neih tawh

dawn avangin ERO leh AERO ten ram leh hnam hmangaihna thinlung pua, fimkhur taka hna an thawh a pawimawh thu a sawi a ni.

<><><>

KHAWZAWL SUNFLOWER

Khawzawla nihawi tel litre 2,000 her chhuah chu vawiin khan Bawrhsap Pu K. Vanlalthiana'n khaw hrang hranga thawh chhuah turin a vai liam.

Khawzawl Bawrhsap chuan nihawi chin leh a tel her chhuah kawnga Khawzawl District Agriculture Office, Khawzawl KVK leh loneitute thawhrimna chu fakawm a tih thu a sawi a. Loneitu 120 laiin ngaihtuahna thar senga nihawi chinga, a tel an her chhuak thei chu lawmawm a tih thu sawiin, Khawzawl district an chawimawi tak meuh tih a sawi a. An tel her chhuah chu an sum lakluh zat atang chauha a hlutna teh lovin, ngaihtuahna thar an neihna leh tel tha leh hrisel zawk an her chhuak chu a hlutna dik tak a nih thu a sawi a, kumin hun lo kal zel turah pawh hei aia tam zawk leh tha zawk thar chhuak turin duhsakna a hlan a ni.

Bawrhsap hian nihawi tel thar chhuak tam ber loneitu pathum hnenah lawmman a hlan bawh a ni.

<><><>

VB:G RAM G

Rural Development & Administration (RD&A) Department chuan Mizoram chu VB:G RAM G hmang tura a in peih tawh thu a sawi.

Vawiina Ministry of Rural Development atanga lo kal, Inspection Team te'n Mizoram-a VB:G RAM G inbuatsaihna rawn enin an rawn kawmnaah he thu hi RD Minister Prof Lalnilawma chuan a sawi a. Minister chuan tun thla ni 8 khan VB:G RAM G chu a hoa tlangzarh a nih thu sawiin District leh Block Orientation te pawh neih a nih tawh thu leh Mizoram chu VB:GRAMG Scheme 2026 India rama peih hmasa ber a nih thu a sawi a ni.

Ministry of Rural Development hian State sawrkar in harsatna an tawh, MGNREGA hnuaia Admin Component, cheng vbc 6 leh nuai 83 la release loh te pawh release thuai anih tur thu Minister hi an hrih bawh. Ministry of Rural Development atanga Inspection Team lo kalte hian naktuk ah Mamit District an tlawh ang a. Reiek RD Block pawh tlawhin, MGNREGA hnuaia hnathawh tawh leh VB:GRAMG hnuaia hnathawh mek te enin, Gramin Rozgar Guarantee Holder te pawh a hmun a kawmna hunte hman an tum a ni.

<><><>

GUERILLA FIGHTER ATANGIN CHIEF MINISTER

MNF President, Pu Zoramthangan a tawnhriat ziahna bu Mizo Tawnga a ziah 'Guerilla Fighter atangin Chief Minister' tih chu vawiin a piancham khan MNF Part Office ah tlangzarh a ni.

Kan corr report ngaithla ang.

MNF President, Pu Zoramthanga lehkhabu ziah 'Guerilla Fighter atangin Chief Minister' tih chu Deputy chief minister hlui Pu Tawnluian vawiin khan a tlangzarh a, he lehkhabu hi Saptawnga tihchhuah tawh a ni a, Pu Zoramthanga chuan a beisei phak bakin Mizoram chhung mai ni lo, ram pawn lam thleng pawha an hlutsak chu lawmawm a tih thu a sawi a. Thangthar lo awm zel tur tan Mizo hnam movement chanchin mamawh lakkhawm theihna tur 'Mizo Hnam Movement Dictionary' tangkai tak anih ngei a beisei thu a sawi a ni.

Lehkhabu tlangzarhtu Pu Tawnluia, Underground sorkara Army Chief lo ni tawh chuan Mizo hnam movement-ah a tir atanga tel, vawiin thlenga la dam puitu, kum 36 zet MNF President ni mek Pu Zoramthanga'n a lehkhabu ziah 'Guerilla Fighter atangin Chief Minister' tih lehkhabu chu thang leh thar lokal turten Mizo Nationalism tun dinna atana tangkai taka an hman a beisei tih a sawi a ni.

Lehkhabu thlirlawktu MZU Mizo Dept HOD Dr.Zoramdinthara chuan he lehkhabu hi mahni chanchin leh sulhnu ziahna chanchin (autobiography) a tih theih a ti a. He lehkhabu tawngkam a hmante chu a tluanglam a, a chiang a, a fiah bawh a, hei hian thuziak thiam tak a nihna a tarlang a ti a. He lehkhabu hian mahni infakna thu pakhat mah a zep tel lo a ni, a ti bawh.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

GORKHA YOUTH

Mizoram Gorkha Youth Association (MGYA) Central chuan vawiin khan Aizawl Vanapa Hall-ah Nepali thu leh hla thiam hmingthang, Adi Kavi Bhanu Bhakta Acharya piancham vawi 212-na (Bhanu Jayanti) an hmang.

He hunah hi zirtirtu pension leh social worker Pu Raju Shahi, MGYA Central-a hruaitu hlun tak ni bawh chuan a hmanpui a, MGYA hian kum 1992 atang khan he ni hi an lo hmang tan tawh a ni.

Adi Kavi Bhanu Bhakta Acharya hi Nepali literature 'Pa' tia koh a ni a. Ramayana chu Nepali tawng ngeia a lehlin avangin mi naran te'n thu leh hla leh sakhaw hriatna an lo neih phah a, Nepali tawng leh thu leh hla tihhmasawna kawngah hna ropui tak a thawk a ni.

He hunah hian MGYA chuan zirlai hlawhtling, High School, Higher Secondary, Graduation leh Post Graduation-a Distinction-a pass mi 67-te hnenah chawimawina an hlan bawh a ni.

<><><>

SUPREME COURT ON CITIZENSHIP

Supreme Court chuan khua leh tui nihna leh ramdangmi nihna tihchian dan chu dan dik tak hnuaiah leh thlei bik awm lova fim taka kalpui tur anih thu a sawi. Assam-a Foreign Tribunals-in ramdangmi "foreigner" anga a puan mi 27 ten sawrkar an khinnaah he thutlukna hi a siam a. Gauhati High Court chuan heng mi 27 te hi Foreign Tribunal-in foreigner anga a puan chu a nemngheh sak a. Hemi hnu hian Supreme Court lamah an zualko avangin an thubuai hi ngaihtuah leh a ni a. Justice Vikram Nath leh Justice Sandeep Mehta te chuan he thubuai hi ngaihtuahin khua leh tui nilo ten dan hrula khua leh tui nihna an dil thin veng tura state hmalakna chu a hriatpui a ti a. Hetihrial hian Gauhati Highe Court thutlukna chu hnawl sakin an thubuai Tribunal lamin an ngaihtuah that leh hma chu an chung a dan anga hmala rih lo turin a a ti a ni.

<><><>

VIETNAM

Vietnam-a lawng chesuala thi India mi 15 te ruang chu vawiin khan phurh haw a ni. Puan tawh angina Phu Quoc Island-a lawng pilah hian India mi khualzin 15 an thi a. Vietnam-a India Embassy chuan India-ah a hma thei ang bera phurh haw an nih theih nan hma a la nghal a ni. Nimin khan mi 36 phur lawng chu Rut NGoal Islet-ah tuifawn nasa thut avangin a pil a. Lawnga chuang mi 21 chu chhanchhuah niin midang 15 an thi a. An vai hian India mi khualzin vek an ni a. Indian Embassy sawidanin mitthi te hi Tamil Nadu atangin mi 10, Andhra Pradesh atangin mi pathum leh Keralam atangin mi pahnih an ni.

<><><>

BANGKOK

Thaland khawpui Bangkok-a zu dawr kangah mi 27 an thi.Mitthite hi mipa pakua leh hmeichhia 18 an ni a. Mi 60 chuang damdawiinah enkawl an ni a. Kangthelhtute chuan nizan zanlai pelh hret khan kangmei hi chhuak tih an sawi a. Prime Minister Anutin Charnvirakul chuan ruang 27 lakchhuah tawh a ni a ti a. Kangmei chhuah chhan hi chhui mek a ni a. Vanduaia thlenna hmun hi chaw dawr leh intihhlamna hmun lun tak nia hriat a ni.

<><><>